

昨
非
庵
日
纂

昨非菴日纂三集韜頴卷之十九

閩中昨非居士鄭瑄漢奉甫輯

梁陶弘景隱居華陽絕意仕宦高祖往見問之
曰○山○中○何○所○有○弘景答曰○山○中○何○所○有○嶺○上
多○白○雲○但○可○自○怡○悅○不○堪○持○贈○君○後武帝屢
聘○不○出○

高叔嗣答袁永之云○僕高枕丘中○逃名世外○耕
稼以輸王稅○采樵以奉親顏○于時新穀既升○

田家大洽肥羜烹以享神枯魚燔而召友策
筮在戶桔槔空懸濁酒相命擊缶長歌茲鄙
人之自快而故人之所與也

沈鳳峰曰夜來月色清絕一碧無翳小園諸品
影落清溪掩映如畫諸弟對影團坐談諧雜
俗醒後相笑樂劇飲無笑命童子以吳音調
鶴南飛聲入雲杪因念二十年誤落塵網奔
走折腰豈知有四時之景今幸得歸蒼松白

鶴猶笑主人歸來之晚

風翻貝葉絕勝北闕除書水滴蓮花何似華清
宮漏一室經行賢于九衢奔走六時禮佛清
于五夜朝天鳴琴流水疑魴鮪之來聽散帙
當軒喜竹簾之交翳瞑目跏趺落花飄而滿
几冥心入定麤鼠出而行堦娟娟月露下簷
葡而生香嫋嫋山風入松篁而成韻掃有掃
無卽掃字而亦掃忘形忘物并忘字而亦忘

斯能所之雙寘。會靈心于絕代。

鄧旦博極群書。絕意進取。日以詩酒自適。士夫競迎致之。不屑往。卜築東郭之石巖。扁一小齋曰尚友。郡檄下同儕趣行。旦曰。勿復敗吾佳思。

崔唐臣閩人。與蘓子容。呂晉叔善。二君登第。唐臣遂罷舉。一日艤棹河次。二君偶見之。問以別後事。曰。初簡橐中有錢百千。以其半買此。

舟以其半居貨往來江湖南貿易自給愈于
應舉覓官時也。次早二君自署中還見崔留
刺。亟訪之。則莫可踪跡矣。視其刺末一絕云。
集賢仙客問生涯。買得魚舟玩歲華。案有黃
庭樽有酒。少風波處便爲家。

余一日無山水友朋。便覺靈心不活。每當悶坐
間。井俗務糾纏。便憤欲死。抑鬱之久。一從輕
舟。望見遠山新翠。便躍躍欲舞。見一快友。把

酒論文便忘身世。天地大矣。何處不可容余。
一人。嘯傲山水友朋之間。以自適志哉。

富貴之士。不能放意于江山松竹之樂。而山川
怪奇。烟雲竹石。詩酒風月。惟遺逸未遇之人。
始得兼而有之。故天地間雄偉不凡之處。天
所以資賢人。而舒其憂鬱之思也。

南安翁。南安人。陳元忠。嘗赴省試。過南安。日暮。
宿野人家。主翁麻衣草履。而舉止譚笑。頗類

士人遲明別去。元忠以事留泉城。見翁倉皇而走。元忠詰之曰。長男爲關吏所拘。業已送郡。翁率次兒詣庭下代杖。兒就翁耳語。翁叱之。郡吏疑而問。對曰。大人累典州郡。翁曰。兒言妄耳。守詢詰勅在否。兒曰。向作一束置甕中。埋之山下。守立遣吏發取。果得之。卽延翁上坐。釋其子。次日造訪室。已虛矣。

韓熙載。滌人。官中書令。多蓄妓妾。以歌舞自娛。

謂僧德明曰。吾爲此欲避入相耳。僧問故曰。中原擾亂。一旦真主出。棄甲不暇。吾可作千古笑端。生平高簡自亢。江左稱韓夫子。嚴續嘗請熙載。撰其父神道碑。以珍貨麗鬘爲潤筆。文成。但叙譜裔品秩。略不道續事業。三乞韓改竄。直以向所贈及姬悉還之。

禰鴟勃鷄。文字最能賈禍。陳驢林鶴丘壑大可藏身。

我枕曲肱。過眼浮雲一片。客開俗口。洗心清磬。
三聲。

垂楊小橋。紙窓竹屋。焚香燕坐。手握道書一卷。
客來則尋。嘗茶具本色。清言日暮。乃歸。不知
馬蹄爲何物。

吾輩今日。只宜讀書靜坐。明理觀時。若朝家事。
既非吾所能爲。便不可發口。譬幽閨刺繡。而
齒及婚姻以後。如何理錢穀。如何課臧獲。里

之嬪竊昵其春心動矣。每見文壇聚首輒或
談兵談餉談將略談時事得失毋論書生遙
度語屬瞽撫卽言而有當不知賈長沙未遇
漢文肯向鄉里兒作痛哭流涕語否且處此
疑忌之時名法漸嚴當事者憐才念少防範
意多慷慨之帝談卽可指爲處士之譏議吾
深懼其後矣。

陵守崔鉉問曰。君隱者之漁耶。對曰。姜子牙。
嚴子陵。世皆以爲隱者。殊不知釣其名耳。
汜騰。甘州人。屬天下兵亂。解官歸。郡守造之。杜
門不見。嘗曰。生逢亂世。貴而能貧。乃可以免。
悉散家貲。贍其族。灌園讀書。澹泊自適。刺史
張闕徵爲府司馬。謝曰。門一杜。其可開乎。
陶峴。岷山人。雅好游覽。治三舟。一自載。一置賓
客。一貯飲饌。日與孟雲卿輩幽探山水。必窮。

其勝諸貴人慕而招之。不屑往也。自號麋鹿野人。

杜預刻石爲碑。自記勲績。一沉漢水之中。一置萬山之上。曰。後世不有高峰爲谷。深谷爲陵之事乎。白居易哀集所爲詩稿。寄之佛藏。一在廬山東林寺。一在東都聖善寺。一在蘇州南禪院。各有記。以二公勲業文章。何患無名。猶自標榜若此。寧其甚矣。

後魏賈景興○栖遲不仕○每捫膝曰○吾不負汝○不以拜榮顯故也○

程頤嘗遊成都○見治篋籀笱者○挾冊就視之○則易也○篋者問曰○若嘗了此乎○因論未濟○頤則弟爽然○後謂袁滋曰○易學在蜀○滋入成都○見賣醬薛翁者○與語○大有得○蓋篋叟醬翁○皆隱君子也○

呂希哲○退居宿州真揚間○十餘年○靜坐一室○日

讀易一爻。家事一切置之不問。不以毫髮事
托州縣。其詩曰。除却借書沽酒外。更無一字
擾公私。李公隱居陽山。以詩酒自娛。日惟憑
一几。焚香玩易。所居扁曰。學易處。其于死生
禍福之說。尤爲洞達。嘗有詩云。一室焚香几
獨憑。蕭然興味似野僧。不緣嬾出忘巾櫛。免
得時人有愛憎。

一花一竹。一爐一几。詩編經卷。以送殘日。交遊

止于田父。談話止于烟霞。生涯止于蒔莠。朝
市升沉事絕不到門。卽到門輒有松風吹之。
使去。

面面溪山繚繞。村村烟樹朦朧。身在淵明記裡。
家居摩詰圖中。

無以樂饑。深山之薇。孰禁我採。無以禦寒。南簷
之日。孰禁我曝。夜行無燭。遙空之月。孰禁我
弄。晝寢無簾。幽林之磴。孰禁我眠。炎蒸無罨。

虛谷之風。孰禁我乘。饕餮無魚。長江之釣。孰
禁我下。喬松修竹。撫瑤琴也。懸壁飛泉。下玉
漏也。小桃間柳。列錦屏也。嫩草護苔。設重茵
也。淡雲遠樹。開畫圖也。鳴鶴翔鸞。呈歌舞也。
落花流水。煥文章也。怪石。吾玩器也。古洞。吾
離宮也。澗毛。吾珍羞也。鹿豕。吾童僕也。好鳥
相呼。吾朋友也。烟巒拱揖。吾賓主也。

宋朱希真。居嘉禾。陸放翁。嘗與朋儕詣之。聞笛

聲自烟波間起。問行者曰：此先生吹笛聲也。頃之棹小舟而至。則與俱歸其家。室中懸琴筑阮咸之類。皆希真平日所留意者。檐間育珍禽。皆目所未覩。室中盤缶貯果實脯醢。客至挑取以奉客。詩曰：青羅包髻白行纏。不是凡人不是仙。家在洛陽城裏住。卧吹銅笛過伊川。可想其風致也。

一寸二寸之魚。三竿兩竿之竹。雲氣蔭于叢著。

金精養于秋菊。棗酸梨酢。桃梳李蒸。落葉半
床。狂花滿屋。名爲野人之家。是謂愚公之谷。
論聲之韻者。曰溪聲澗聲。竹聲松聲。山禽聲。幽
壑聲。芭蕉雨聲。落花聲。落葉聲。皆天地之清
籟。詩腸之鼓吹也。然銷魂之聽。當以賣花聲
爲第一。

一片秋山。能療病客。半聲春鳥。偏喚愁人。
闢地數畝。築室數楹。插棹作籬。編茅爲亭。以一

畝○蔭○竹○樹○一○畝○栽○花○果○二○畝○種○瓜○菜○四○壁○清○
曠○空○諸○所○有○畜○山○童○灌○園○薙○草○置○二○三○胡○床○
著○亭○下○挾○書○硯○以○伴○孤○寂○携○琴○奕○以○遲○良○友○
凌○晨○杖○策○薄○暮○言○旋○此○亦○樂○境○

烏○紗○帽○挾○紅○袖○登○山○前○人○自○多○風○致○

吳○正○子○窮○居○一○室○門○環○流○水○跨○木○而○渡○渡○畢○卽○
抽○之○人○問○故○笑○曰○士○舟○淺○小○恐○不○勝○富○貴○人○
來○踏○耳○

何以消天上之清風朗月。酒盞詩筒。何以謝人。
世之覆雨翻雲。閉門高枕。

竹徑松籬。儘堪娛目。何非一段清閒。園亭池榭。
僅可容身。便是半生受用。

皂囊白簡。被人描盡半生。黃帽青鞋。任我逍遙。
一世。

茅屋三間。木榻一枕。燒清香啜茗。讀數行書。
懶倦。便高卧松梧之下。或利頭行吟。日嘗以。

苦茗代肉食。以松石代珍奇。以琴書代益友。
以著述代功業。此亦樂事。

遇名勝地。最不可當面錯過。若待日後。來遊便
不可必。

紙帳梅花。休驚他三春清夢。筆床茶竈。可了我
半日浮生。

夜者晝之餘。雨者日之餘。冬者歲之餘。當此三
餘。人事稍與疎濶。吾可一意學問。何也。良宵。

燕坐篝燈。煮茗萬籟俱寂。疎鐘時聞。當此情
景。對簡編而忘疲。撤衾枕而不御。一樂也。至
如風雨蔽途。掩關却掃。絕人往還。圖史滿前。
隨興抽簡。潺湲在耳。簷花拂硯。如此幽寂。二
樂也。又若空林歲晏。微霰密雲。枯條振風。寒
禽號野。一室擁爐。茗香酒熟。陳結諷誦。宛對
良友。顧此景象。三樂也。

因花索句。勝他牘奏三千。爲崔謀糧。贏却田耕。

二頃。

入山採藥。臨水羨魚。綠樹陰中。鳥道掃石彈琴。
捲簾看鶴。白雲深處人家。

晚間紙窓上。月光漸滿。竹影半橫。取蒲團靜坐。
覺得又是境界。

或夕陽籬落。或明月簾櫳。或雨夜聯榻。或竹下
傳觴。或青山當戶。或白雲過庭。于斯時也。把
臂捉膝。相知幾人。謔語雄談。快心千古。

袁中郎曰。其近來始知損事之樂。所謂損事者。非獨人事。田宅子女皆是也。小窮則小樂。大窮則大樂。衣食僅充。餘則施之。是謂損事要法。蓋有一分餘。則有一分興。作圖度。小餘則造房治屋。大餘則爲子孫計。無所不至。宅則欲析。欲楠。田則欲膏。欲沃。又或謀之不可知。之枯骨。以幸其長且久。此無他。資有餘而心爲之驅使顛倒也。宗少文云。吾已知富不如

貧貴不如賤。始以爲矯談。今乃信之。但看長
安街。夜半時。古廟冷舖中。乞兒丐僧。齟齬如
雷吼。而白髭老人。擁綿下幃。求一合眼。而不
可得。則宗少文之言驗矣。

如今休去便休去。若覓了時無了時。人能行樂
卽今便好快活。身上無病。心上無事。春鳥是
笙歌。春花是粉黛。閑得一刻。卽爲一刻之樂。
何必情欲。乃爲樂事。

白香山所居有池五六畝竹數千竿喬木數十
林臺榭舟車具體而微先生安焉性嗜酒耽
琴淫詩往往乘興肩輿適野尋水望山率情
便去抱琴引酌興盡而返因自吟詠懷詩云
抱琴榮啓樂縱酒劉伶達放眼瞰青山任頭
生白髮不知天地內更有幾時活從此到終
身盡爲閒日月吟罷自哂揭甕發醕又飲數
杯兀然自醉自號醉吟先生云

宋向子志○隱於衡之伊山○乃晉桓伊書堂故基○
結茅爲堂○置書其中○茂竹幽蘭○蔭鬱前後○春
葩秋馥○以時自獻○猿啼近嶂○鷗馴曲沼○馬堞
車喧○杳然雲水之外○胡寅韓璜○自天柱峰南○
襍被枝筇○歲一再往焉○或商較文義○或把觥
賦詩○逍遙徜徉○興盡而後別○

舊詩書○是吾家有緣物○新見解○是吾心最樂事○
高朋來座○是吾破愁城之兵○綠竹橫窗○是吾○

入詩囊之料。以此永日。不知烏兔升沉。以此
怡年。一任燕鴻來往。

竹樓數間。負山臨水。疎松修竹。路屈委蛇。恠石
落落。不拘位置。藏書萬卷。其中長几。軟榻。一
香一茗。同心良友。閑日過從。坐卧談笑。隨意
所適。不營衣食。不問米鹽。不叙寒暄。不言朝
市。丘壑涯分於斯極矣。

耕田鑿井。晚息晨興。侯南山之朝雲。舉北堂之

明月汜勝九穀之書。觀其節制。崔寔四時之
令。奉以周旋。晨荷簑笠。白屋黃冠之伍。夕談
谷稼。霑體塗足之倫。濁酒盈樽。高歌滿席。恍
兮惚兮。天地一指。此野人之樂也。

志倦體疲。則投竿取魚。執衽採藥。決渠灌花。操
斧剖竹。濯熱盥手。臨高縱目。逍遙倡佯。唯意
所適。明月時至。清風自來。行無所牽。止無所
柅。耳目肺腸。悉爲己有。踽踽焉。洋洋焉。不知

天壤之間。復有何樂。可以代此也。

昨非菴日纂三集冥果卷之二十

閩中昨非居士鄭瑄漢奉甫碑
陰德須如耳鳴甫作時蚤有功曹記錄隱惡種
成心病臨報日自然冤對現形

身無病心無憂凡居順境皆從前世脩來衣有
布食有蔬蚤種善因莫向今生蹉過

張八公家富好施鄉人德之號張佛產分二子
每歲禾穀索銅錢六十文一把其歲歉鄉價

八十其子亦增之。八公坐於門看糴者出問其價曰。畧增些少。公以錢還之。自後其子價不敢增至曾玄孫皆登第。黃溪馮公爲人本分亦好施人以呆稱之。其子夢蘭登進士。鄉人謠曰。張八佛子孫享其佛。馮大呆子孫享其呆。

王真人曰。儂血債。必然有報。豈止此事。乃至大小喜怒毀謗打罵是非。見面相嫌。皆是前

因所結舊冤現世要還須當歡喜承受不敢
辨証承當忍耐便是還訖但有爭競便同抵
債不還積累更深冤冤重結永無了期

福建延平杜氏兄弟三人輪膳一母三人出耕

三婦輒詬悖相勝致姑飯粥不給每欲自盡
忽一日白晝中轟雷一聲祇覺電光紅紫眩
目三婦皆人首而身則一牛一犬一豕觀者
如堵

前世殺害多。今報夭折苦。方矜面如花。已見身歸土。哭倒白頭親。怨損朱唇婦。因果鏡中形。毫髮無差悞。

陳揀塘先生云。市賈黃臻爲人質。直謹愿。好善濟人。見惡人。輒搖手縮頸避之。僅一幼子。攜之以隨。嘉靖戊子。德清高塢石馬諸山水驟溢。余時臥病在家。水出几榻上。幾殆。亟乘槎登業師張先生樓。得免。須臾二人乘舟過樓。

下呼曰黃臻父子俱溺死矣先生歎息余獨
弗信曰斯人萬無父子俱死理先生曰迂哉
子也顏天距壽可信天道哉余曰論理之嘗
父子決存其一須臾又一報曰臻尚在其子
死矣余曰是或有之須臾又一報曰臻死矣
其子在余曰是或有之詰旦臻攜其子來自
言抱竹漂三十里值一大樹根遂捫樹上其
子騎一梁木出沒凶濤中逢舟人援之父子

得俱免誰謂天道人心相遠哉

金陵賈客歸自湘東有老翁附舟賈矚翁多金
邀之同爨而翁亦寄心焉行至江中賈與家
僮謀翁墮水取其金歸是年生子及長悖逆
不孝蕩敗家業里有降紫姑仙者賈客叩
之仙降筆曰六月六日南風惡楊子江中一
念錯老翁魚腹恨難消黃金不是君囊橐賈
客悚然魄奪

嘉靖初有汴民陸氏奸而橫侵其隣鄭氏產盡
撤鄭居以爲己室惟存嘉木一本晚歲得子
而暗一日遊于庭忽指樹言曰樹乎爾猶在
耶家人大驚已而復暗百方誘之終不出聲
及長荒淫放蕩靡所不爲家罄乃死人謂鄭
氏後身云

亾秦者胡誰曉冤家卽我後簡點天子那知漏
網在眼前巧力總難勝天長久無逾積善

桶貸負心便結鞭犁種子。姪邪起念已成毛角。

胚胎

偶爾思傷人害物。銅頭鐵額已自後隨翻然欲作善行慈芝炬蓮旛輒爲前導。

朱承逸居雪之城東門爲本州孔目官。樂善好施。嘗五鼓趨郡過駱駝橋。聞橋下哭甚哀。使僕視之。有男子攜妻及小兒在焉。扣所以云。負勢家錢三百千計息數倍。督索無償。將併

命於此。朱惻然遣僕護歸。且自往其家。正見
債家悍僕群坐於門。朱因以好言諭之曰。汝
主以三百千錢之故。將使四人死於水。於汝
安乎。汝亟歸告若主。彼今既無所償。逼之何
益。吾當爲代還本錢。可亟以元券來。債家惶
懼。聽命。卽如數取付之。其人感泣。願終身爲
奴婢。不聽。復以二百千資給之而去。是歲生
孫名服。熙寧登榜第二人。次孫肱亦登第。遂

爲吳興望族。

劉留臺少極貧。專事趨謁。不能自存。一日至漳泉市浴堂中。拾金一袋。浴畢。託疾臥堂內。終夕不去。翌日有人號泣而來。自言爲商八年。只收得金八十五片。以一袋盛之。昨晚與同行携到此浴。浴罷。乘月行三十里。始覺金不見。見劉舉還焉。及歸。鄉人愈薄之。責以拾金不能管生。而復來相干。劉荅曰。吾平生賦分止。

令如此若襲他人之物以爲己有必有禍災
况商人辛勤所積忍令一旦失去耶一夕夢
神人告之曰汝生平安分不貪將有大顯并
及汝後嗣後果登第官至西京留臺子孫在
仕途者二十三人

崔公度赴宣州守江行夜見一舟相隨而行寂
然無聲晚船得港而泊所見之舟亦止近岸
公疑之遣人視之乃空舟也舟中有血痕于

舟尾得皂絲一條。繫文字一紙。取觀之。乃僱
舟契也。因得其人姓名。及牙保之屬。至郡檄
巡尉緝捕。盡獲其人。蓋舟主殺僱舟商。取其
物而棄其舟。遂伏於法。

蔣給事性中。因公差泊舟江岸。有一官舡繼至。
相竝。卽過船共奕。適有一女子。至江邊洗園
桶。官呼隸人縛之。此女甫到家。卽開扉上哭。
聲。蔣謂是此女。畏責而哭。不知已死矣。再三

勸解尋命釋之。俄而此女復甦。臨別語給事曰。明日我先去。公且未可行。次日侵晨。見一舟凌風而去。上有旗號曰。江湖劉節度。公遂不敢解維。是日開船者皆覆溺。蓋公之素行通於神明。故此神來告之耳。

警世語云。堪嘆人心毒。似蛇誰知天眼轉。如車去年竊取東鄰物。今日還歸北舍家。不義錢財湯瀝雪。強來田地水推沙。若將狡獪爲生

計恰似朝開暮落花

歷城尹氏家貧賣糕爲生一日息柳陰客有嚼糕者會大暑解鞍飲馬脫衣而休已乃馳馬去之遺囊焉尹氏舉之弗勝知其金也密徙而覆之暝不見人乃以餅餌裝金坎土埋之植柳爲記客故山西大駟也行賈以萬計乃以稍稍折閱收其餘僅五百金圖返其家失之不敢復見父母妻子遂流丐於越數年柳

且拱矣。客復過故處。尹氏亦仍賣糕。客據地而慟。尹氏詢之。客語以故。尹氏詢所遺金數。與前數合。謂客曰。無慟。起。柳而探之。得金焉。客復慟據地。請曰。柰何有是。惟公取之。與我餘可耳。尹氏不叩中分之。亦不叩曰。我誠貧也。豈其不全撥之。而寡取之。而中分之乎。客不能強。乃稽首申謝而去。尹氏夜夢神謂之曰。汝之陰德厚矣。當貽汝以貴子。彌月而生。

予旻舉進士。爲吏部侍郎。

力心爲善。何須努力看經。意欲損人。空誦如來
一藏。

南京聚寶門軍人何姓者。有一富商。爲訐訟。欲
移城北。念金多。恐有禦人于國者。因買蘆數
萬束。束置銀兩錠。故募以行。其募人不知。念
此蘆耳。與其負重以行。孰若乘而更置。何置
得一束折之。則元寶藏焉。私念此必有故。將

一行人蘆盡置之。少頃見一商徘徊道路。鬱
鬱如有所失。因詰其故。商語之。何曰。弗慮我
已盡得之矣。商喜出望外。願以半贈。何曰。若
貧公財。何爲告公財。自有命。貧乃人之常耳。
商感激不已。因捐半脩剝。爲何祈福。何後二
子一孫俱登第。冠蓋綿綿不絕。

南渡之後。有張居士者。父令賁錢鬻物。經行林
莽。見有人自縊者。急扶而下。及甦。詰之。則爲

官逋所迫耳。遂以所賣錢贈之。其人拜泣去。
張少憇於磐石。俄有操瓢者。問云。將無渴否。
卽傾瓢內漿使飲之。曰。不惟止渴。稍有益也。
居士徒手而歸。覺異香遍體。精爽非常。自此
絕粒。能賦詩。隱居麻姑山。獲仙焉。

蘇有賣油人。祝俸者。窶不知書。性仁孝。當食時。
必待父食。然後食。如子歸晚。其父亦必待之。
雖處貧境。而父子歡然。後值寇亂。挈家避之。

他舟皆行。惟祝舟膠不可動。倉皇殊甚至明。始獲去。昨之先行者皆遇寇踐滅矣。

李公謙值歲荒。出穀千石以貸鄉人。明年又荒。人無以償。公卽對衆焚券。曰。不須復償。及歲熟。人爭償之。一無所受。後復大荒。乃竭家資。煮粥活人。以萬計。死者復爲瘞之。一日夢紫衣人告曰。上帝知汝陰功。報在汝後。言訖而去。後謙百歲而終。子孫位皆通顯。

王海日。陽明先生父也。館一富翁家。翁婢妾衆而無子。一日遣妾就王借種。王峻詞却之。妾曰。此主人意。出片紙書云。欲僭人間種。王卽援筆書其傍曰。恐驚天上人。終不納。明日遂行。後主人修醮。一道士拜章伏地。久不起。主人訝之。對曰。適奏章至三天門下。遇天上迎狀元。久乃得達。問狀元爲誰。道士曰。不敢言。但馬前有一聯云。欲僭人間種。恐驚天上人。

主人怒王薄德。故洩前言。未幾王果狀元及第。位至太宗伯。後其子陽明先生封新建伯。又受封如其爵。

程彥賓爲羅城使。進攻遂寧之日。左右以三處女獻。皆有姿色。公謂女子曰。汝猶吾女。安敢相犯。因手自封鎖。置于一室。及旦訪父母還之。皆泣謝曰。願太守早建旌節。彥賓曰。旌節非敢望。但得死而無負便好。後官至觀察使。

年九十七。無疾而卒。諸子皆仕。

李之純爲成都路轉運使。專以掩骼埋胔爲念。吏人徐熙。專爲宣力。計其所藏。無慮萬計。一日金華街王生死復甦。云見冥官曰。爾以誤追。今當還人間。陰司事雖禁泄露。然爲善之效。亦欲人知。李之純葬枯骨有勞。與知成都府一任。徐熙督役有勞。與一子及第。汝宜傳與世間。後皆如其言。

大通慧姓張。棄家祝髮。師令掌厠盥盆。忽有市
鮮者沃於盆。文偶擊之仆地死。文懼奔西華
寺。久之爲長老。忽曰。三十年前一段公案。令
日當了。衆問故。曰。日午自知之。一卒持弓至
法堂。瞠目視文。將射之。文笑曰。老僧候已久。
卒曰。一見卽欲相害。不知何訾。文告以故。卒
悟曰。冤冤相報何時了。劫劫相纏豈偶然。不
若與師俱解釋。如今立地往西天。視之立逝。

矣。文卽索筆書偈而化。

四明陳桎。作通鑑續編。書宋祖陳橋事。曰。匡胤自立而還。方屬筆。雷忽震其几。子桎色不變。因厲聲曰。老天若擊析。桎之臂亦不改矣。後晝寢。夢人召至一所。門闕壯麗。如王者居。門者奔告云。陳先生來矣。殿上傳呼升階中坐者。冕旒黃袍。降坐迎曰。朕何負卿。乃比朕墓耶。桎知其宋祖也。謝曰。臣觸陛下罪應死。然

史貴直筆。陛下雖殺我。不可易也。王者俛首。
經下階。因驚覺。

表盡報十世之讐。不知雖經萬劫而必報。師子
債殺命之債。不知雖通小債而必償。萌芽各
認根苗。點滴不差。簷溜。

佛前不但行穢。卽放言亦自減算。僻地不但救
人。卽起念常有天知。

陸平泉初姓林。會試時。王華爲松守。夢城隍庭。

下皆保林善人問之名樹聲明日召林外父
問曰汝壻平日何爲李曰只是不苟是科平
泉會試第一

嚴光之子恭賈維楊舟次江潯市龜五十放之
一自家署見披黑衣者五十人送緡錢五千
曰君之子揚州所附及恭回語之實未嘗有
乃悟贖龜之故遂捨宅爲寺以田爲湖
衛仲達爲館職病夢入冥府立庭下伺命有四

人坐其上。西向。少年者呼朱衣吏諭急。吏捧
牙盤而上。中置紅黑牌二。紅者以金書善字。
黑者以白書惡字。少年指黑。吏持以去。少焉。數
人捧薄書出。盈庭。卽有一秤橫前。兩首盡有
秤。吏舉薄置束。秤重壓至地。地爲動。四人皆
失色。復謂吏曰。更與檢善看。指金字牌。忽西
北偶微明。如落照狀。一朱衣道士捧玉盤出。
四人皆起立。道士居中而坐。望玉盤中。文書

僅如箸大。吏持下置西牀。牀亦壓地而東。牀
高舉。大風歛捲無存焉。四人起相賀。衛拱手
曰。仲達年未四十。平生不敢爲惡。何由簿書
充塞如此。少年曰。舉念不正。此卽書之。何必
真犯。衛謝曰。敢問善狀何事。少年曰。朝廷興
工修三山石橋。君曾進諫。此乃奏稿也。衛曰。
雖曾上疏。朝廷不從。何濟於事。曰。事之在君。
盡矣。遂遣導歸。

楊仲希新津人。微時客成都某氏主人少婦。出而調客。仲希正色拒之。其妻是夕夢一人告曰。汝夫獨處他鄉。不欺暗室。神明知之。當魁多士。次年果擢第一。

世人眼光短。見善惡急於得報。若一時未驗。便謂因果無徵。不知報之遲速。不出四五十年。此數十年。在無窮中。直一瞬耳。此老無急性。有記性。人但辦一片忍耐心。長遠心。打大竿。

盤歸除到底久定不錯也

王文肅錫爵以子緱山衡病祈夢于墳夢中忠
肅語之曰公記斬一單名帖矣活二十七人
之命否公惘然蓋巡道執海商爲盜衆憐之
請一名帖往解而終不應二十七皆拷掠死
嗟乎矜名節人恆忍遂至於此冥冥中蓋有
識之者矣

奚百三本一贅者一日見一道者請一舖家乞

一文錢舖家睚眦不與百三嫉之乃自探腰間一錢與之是夕卽夢道者與之去贅及覺頤贅果落

江陰張畏暑有聲藝林甲午應南畿鄉試寓寺中揭榜無名大罵試官以爲眯目有道者從旁微哂曰相公文必不佳張大怒叱言汝烏知之道者曰作文貴心氣和平聽公怒罵心氣如此文安得工張不覺屈服就而請教道

者曰中不中有命然須自家做箇轉變如得
張曰命若不中如何轉變道者曰造命者天
立命者我力行善事廣積陰德而又加意謙
讓以承休命何福不可求哉張曰我貧儒安
得錢來行善事積陰德乎道者曰善事陰功
皆繇心造嘗有此心功德無量且如謙虛一
節並不費錢你如何不自反而罵詆官乎張
繇此感悟折節自持舊處一館有服役童子

甚悍時加責詈。後三年在館氣亦不呵其面。
丁酉夢至一室。啓櫃得試錄一冊。中多闕行。
傍人曰。科第三年一考較。內所闕皆原該中
式。新有薄行而去之者也。捐後一行云。汝三
年來持身頗慎。或當補此。珍重自愛。是科果
中壹百伍名。正傍人所指也。

馮琢吾侍郎之父。爲邑庠生。隆冬蚤起赴學。路
逢一人倒臥雪中。捫之半僵矣。遂解已綿裳。

和之。且扶歸。救甦。夢神人告之曰。汝救一人。
命。出自誠心。吾遣韓琦爲汝子。及生。琢吾遂。
名琦。

幸臣司馬申。好陷害正人。一日晝寢於尚書省。
忽有一聚惡鳥。飛集其身。啄其口。腦血流被。
席而死。

尚書姚思仁。病患熱五日不蘇。魂忽離體。遊于。
野。見城郭車馬人物。一如人世。惟陰謁無日。

光至一官闕前多罪人桎梏忽聞階下大聲
稱冤曰昔爲仁杖死者來索命仁曰吾奉天
代狩所執者法吾昔杖汝時曾受賄否曰無
之曾受囑否曰無之曾徇喜怒否曰無之仁
曰三者皆無則汝死于法非死于我也因至
殿中與冥王相對而立曰幽明一理仁奉命
執法死于法者今來索命大王今日囚徒滿
前或砍或剝慘于人間十倍異日此輩亦當

爲大主索命否。王命此輩去。卽隨風滅。仁曰。
試爲我較勘善惡。王命持簿來。仁名下所註
惡。卽一念之動者。皆書。仁曰。此未嘗爲何爲。
書。王曰。未爲名爲過。已爲卽爲罪。不可解矣。
及閱善簿。其大者如題山左之水災。收河南
之閒礦。奏疏一一具錄。至己亥歲。畿南大荒。
仁上疏請米三十萬賑濟。列爲大善。仁曰。仁
僅具名。疏稿乃賀燦然之筆也。王曰。疏出君

名。虧。一。律。罪。君。當。之。歸。君。爲。是。仁。乃。索。賀。籍。
閱。之。王。曰。賀。君。無。子。今。與。一。子。足。矣。卽。別。出。
遂。甦。賀。久。艱。得。子。至。來。歲。果。舉。一。子。

蕭蘭玉山人家貧住縣前以書理生涯每逢人
做狀先爲十分勸息不得已方爲寫狀必叩
其情實方纔下筆嘗數日不舉火寧忍饑不
肯爲人杜造一語後家貧無計發憤習武官
至都督總兵

錢一爲皂隸。因秦檜酷刑責人。嘗至死。後雖少悔。只以流血爲度。隸乃巧藏猪血在板。如是九年。忽一日立班中。見其足離地而起。檜呵其爲妖。問之。隸答以前情。曰。某今日應上昇。言未畢。乘雲而去。

商文毅公輅之次。初爲嚴州府吏。嘗勸群吏奉公守法。不可舞文害人。諸縣囚解府者。公委卹卹。按多所全活。一夕太守筵見吏舍有光。

踪跡之。非火也。翌日間夜來有何事。群吏對
云。商某生一子。太守異之。曰。此子必貴。漏月
抱來一看。及抱至堂。太守驚其命。張黃羅傘。
送至公廨。後舉三元入內閣。

聶明賦性險惡。好勇健訟。以刀筆起家。值歲凶。
米價騰湧。明有米數倉。堅執不糶。一日請闕
聖廟問筊。某有米欲糶。近日價方長。如數日
內得長二兩外。一石乞賜上上筊。卓立於地。

明僂倮拾箋忽架上大刀。若有人推狀倒下。
正劈明背。內裂骨碎而斃。

暗箭射人者。人不能防。借刀殺人者。已不費力。
自謂巧矣。而造物尤巧焉。我善暗箭。造物還
之以明箭。而更不能防。我善借刀。造物還之
以刀。而更不費力。然則巧于射人殺人者。
乃巧于自射自殺耳。

凡人之爲不善者。造物未必卽以所爲不善。

事○報○之○而○或○于○別○一○事○報○之○別○一○事○又○未○必○
大○不○善○也○而○得○禍○甚○酷○天○公○總○前○後○算○來○未○
嘗○毫○釐○爽○也○

崔浩不信佛法。嘗曰：何爲事此胡神？說魏主盡
誅天下沙門。一時長安沙門并塔廟無復子
遺。浩妻郭氏敬好釋典。時嘗誦讀。浩怒取而
焚之。捐灰廁中。及浩幽執。被置檻內。送于城
南。使衛士數千人。洩其上。呼聲磬磬聞于行。

路。自來宰司之被戮。未有如浩者。始知爲
果報云。

臘月三十日到來。恩愛也使不着。勢力也使不
着。財寶也使不着。性氣也使不着。官職也使
不着。富貴也使不着。眼光落地時。惟有平昔
遇善。遇惡。兩路境界。一一現前。